

[Augsburg], 12. Mai 1552

An Johannes Oporinus

UB Basel, Fr. Gr. I 11, fol. 157r.  
Steinmann Nr. 658.

S. P. D. Quo in loco res tuae sint, nescio. ad te scripsi saepius. responsi intra menses, nisi fallor, quatuor, nihil accepi, ac de meis quidem nugis minus labore, sed an literas eas acceperis, quibus tibi scripsi, dominum meum, si opus de quo egisti tecum, a Lazio sibi dedicaretur, non recusare quo minus 500 aureos tibi ad excudendum suppeditet: sed sine dedicationis honore impensarum quoque onere carere velle: scire aliquid mea interest. Misi etiam per eundem tabellarium a Frobenio huc missum, librum quendam Amerpachij cum literis. De quibus, acceperis nec ne, aequè sum incertus. Quare de vtraque re cognoscere cupio. Vtinam verò silentij tam diuturni causa non alia sit, quam aut occupationes tuae, aut tabellarij penuria. Meae res interea nihil mutatae sunt, nisi quod laboribus indies obruor, qui mihi nullum quicquam seriò commentandi tempus concedunt, animo herilibus negocijs occupato, et valetudine lucubrationes recusante. Relegi tamen vtrunque Isocratem, quem mirum in modum ante meum obitum excusum vellem, idqüe Augustae, si sine fraude atque molestia tua fieri posset. Malo enim qualicunque charactere imprimi, quam diuturna frustratione opprimi. Literas tuis inclusas si Dolam ad fratrem meum mittendas curaris, gratiss[imum] erit. Vale ac per occasionem, saltem breuiter, de rebus omnibus rescribe. 4. idus Maij. Anno 1552.

Hiero[nymus] W[olfius] T[uus].

Noui quod scribam, nihil habeo, nisi quod nos hic adhuc mediocri tranquillitate fruimur, sed ignari, quandiu duratura.

Si qui posthac exotici libri et noui (nam vsque ad anni 52 initium plerosque habemus) ad te peruerent, de ijs si Francofordia singulos huc miseris, domino meo rem gratam facies, et tibi vt spero vtilem, modò signifiques, quibus conditionibus agi tecum velis. Iterum vale, et saluta amicos.